

Huet

I.

Li plusour ont d'amours chanté
Par effort et desloiaument;
Mes de tant me doit savoir gré,
Qu'onques ne chantai faintement.
Ma bone foi m'en a gardé,
Et l'amours, dont j'ai tel plenté
Que merveille est se je rienz hé,
Neïs cele envieuse gent.

II.

Certes j'ai de fin cuer amé,
Ne ja n'amerai autrement;
Bien le puet avoir esprouvé
Ma dame, se garde s'en prent.
Je ne di pas que m'ait grevé
Qu'el ne soit a ma volenté,
Car de li sont tuit mi pensé,
Mout me plet ce que me consent.

III.

Se j'ai hors du païs esté,
Ou mes biens et ma joie atent,
Pour ce n'ai je mie oublié
Comment on aime loiaument;
Se li merirs m'a demoré
Ce m'en a mout reconforté,
Qu'en pou d'ore a on recovré
Ce qu'on desirre longuement.

IV.

Amours m'a par reson moustré
Que fins amis sueffre et atent;
Car qui est en sa poësté
Merci doit proier franchement,
Ou c'est orgueus; - si l'ai prouvé;
Mais cil faus amorous d'esté,
Qui m'ont d'amors ochoisoné,
N'aiment fors quant talens lor prent.

V.

S'envïous l'avoient juré,

Ne me vaudroient il nient,
La dont il se sunt tant pené,
De moi nuire a lor essient.
Por ce aient il renoié Dé,
Tant ont mon enui pourparlé
Qu'a paine verrai achevé
Le penser qui d'amours m'esprent.

VI.

Mes en Bretagne m'a loé
Li cuens, cui j'aim tot jors aé,
Et s'il m'a bon conseil doné,
Ce verrai je prochainement.

- letto 331 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/huet-32>